

1^r

Dem durchlechtigsten hochgepornen fursten vnd herren: hern
Fridrichen Hertzogen zů Sachsen / Landtgraüen in Doringen vnd
Marggrafen zu Meyssen / Des heiligen Romischen Reichs Erbmarschalch
vnd Curfursten vnd meinem gnedisten herren / Empewt Jch Dietrich
von Pleningen zu Schoubegk vnd Eysenhouen Ritter vnd doctor. Mein vn-
dterthenig willig dinst mit sondern vleis / Gnedigister furst vnd
herr / wiewol ich neben des durchleichtigen hochgepornen fursten vnd
herren / hen Ludwigen Pfaltzgrauen bey

1^v

Reyn Hertzogen in Oberrn
vnd Nidern Bairn vnd meins gnedigen herren furstlichen beuelchen
vnd obligenden geschafften / mitler Zeit vnd ich euren Curfurstlichen
genaden meinen geteutschten Salustium zůgeschickt vber angekorten
vleis gar wenig muessig tãge erlange mogen. so hab ich mir doch die
selbigen tãg nyemande dann allain Euren Curfurstlichen genaden zu
Ern vnd gefallen / vndertheniglichen zuůerzern fůrgenomen. In beson-
derer bewegung Dieweil ich hieruor durch vilfaltig glaubliche vnd
grundt

2^r

liche erfahrung wares wissen empfangen han. das die selb eur
Curfurstlich gnad vor allen andern geistlichen vnd weltlichen Cur-
fursten vnd fursten des heiligen Romischen Reichs / aller loblichen
Kunsten vnd guter sitten besonderlichen der Philosopheij ein ge-
trewer furderer liebhaber vnd gnediger vatter ist / die sprichwort
deß heiligen hochberompten mans Senece / aus Latinischer in teutsche
alls mein muterliche sprach zupringen. Gnedigster herr / das ich ge-
sagt des heiligen mans Senece sprichwort: das hab ich getan: auß be-
wegung

2^v

des heiligen Sant Pauls Apostels auch des gedachten
Senecen Episteln vnd Missiuen die sy gegen einander geschriben /
gutlich vnd wol bzenemen das der selb Seneca ain haymlicher
Crist vnd heiliger man gewesen sey. Deß sich dann auch dieweil Er mit
dem heiligen Apostel sannt Paulsen Jn sollicher frundschaft vnd
ainigkait gelebt vnd gewest nit zuerwundern ist / Dem allem nach:
vnd auf das Eur Curfürstlich gnad meiner willigen vnd gevlissen
dienstparkait wares vnd grundtlichs wissen empfangen mogen: So vber-
schick ich den

3^r

selben eurn Cūrfurstlichen genaden dis mein
tranßlation mit vndertheniger Bit / die selben Eur Curfustlich
genad wollen sollchs von mir mit gnaden annemen. vnd will mich also
domit Eurn Curfurstlichen gnaden vndertheniglichen befolchen haben
Geben zū Landshūt aūff den Sechzehenden tag des Monets Decem-
bris nach cristi vnsers heilmachers gepurt Anno 1515.